

“BASES REGULADORAS DA CONVOCATORIA DE AXUDAS POR NACEMENTO OU ADOPCIÓN DE FILLOS/AS NO CONCELLO DE CORTEGADA DURANTE OS ANOS 2020 e 2021.

Primeira. Obxecto e finalidade

É obxecto destas bases regular as condicións e réxime xurídico para a concesión de subvencións por nacemento de fillos/as, adopción e acollemento no concello de Cortegada.

A finalidade destas axudas é proporcionar apoio económico a aquelas familias nas que se produza o nacemento, adopción ou acollemento dun novo membro da unidade familiar, para contribuír a atender as necesidades extraordinarias que sobreveñen.

Tamén se trata de incentivar o asentamento da poboación no noso concello.

Para a consecución desta finalidade, o Concello de Cortegada dotou crédito polo importe de 3.000,00 € na aplicación orzamentaria 23.480 do seu orzamento para o ano 2021.

Segunda. Natureza da axuda

As axudas que se outorguen conforme a este regulamento teñen a natureza de subvención en réxime de concorrencia non competitiva, conforme ao establecido no artigo 19.2 da Lei 9/2007, do 13 de xuño, de subvencións de Galicia.

A través do procedemento regulado nestas Bases, o Concello de Cortegada concederá subvencións polo nacemento ou adopción dun neno/a durante os anos 2020 e 2021, sempre que os beneficiarios cumpran os requisitos desta norma.

O aboamento da citada cantidade efectuarase nun pagamento único cando se

resolva favorablemente a súa solicitude e será compatible con calquera outra axuda que se perciba por este motivo, procedente doutras administracións.

Terceira. Beneficiarios

Serán beneficiarios das subvencións reguladas nestas bases:

1. Os proxenitores, xa sexan casados, solteiros, parellas de feito ou familias monoparentais que tivesen descendencia no ano nos anos 2020 ou 2021 (desde o 1 de xaneiro de 2020 ata o 31 de decembro de 2021) sempre que cumpran os demais requisitos esixidos para o seu recoñecemento. Nos supostos de nulidade, separación ou divorcio dos proxenitores, o beneficiario da prestación será aquel que teña a custodia dos fillos, de acordo co establecido no convenio regulador ou sentenza de separación ou divorcio.

2. Os adoptantes ou acolledores de nenos de ata 3 anos que obtivesen a resolución xudicial no ano 2020 ou 2021, sempre que cumpran os demais requisitos esixidos para o seu recoñecemento.

Se os solicitantes fosen estranxeiros, poderán solicitar a axuda os que cumpran as condicións da Lei orgánica 4/2000, sobre dereitos e liberdades dos estranxeiros en España.

En ningún caso poderán ser beneficiarios os proxenitores privados da patria potestade dos seus fillos, ou se a tutela ou garda fose asumida por unha institución pública.

Cuarta. Requisitos para obter a subvención

- Ser español ou estranxeiro con residencia legal en España.
- Será requisito imprescindible para o recoñecemento da subvención que os beneficiarios residan no municipio con carácter definitivo e acreditado neste Concello (polo menos un dos dous proxenitores, no caso de casados ou parellas de feito coas que

convivan -o que deberá acreditarse debidamente- ou, no caso de familias monoparentais. Enténdese por familia monoparental a formada pola nai ou polo pai que convive co fillo ou filla e constitúe o sustentador único da familia e acreditarase mediante a documentación do xulgado sobre pensión de alimentos ou exercicio de accións legais para a obtención desta, sentenza de separación/divorcio, convenio regulador ou resolución de medidas paterno-filiais).

- Os beneficiarios deberán acharse ao corrente nas obrigas tributarias con Facenda do Estado, da Xunta de Galicia, coa Seguridade Social e co Concello de Cortegada, cuestión esta última que será comprobada de oficio.

- Que os nenos convivan co solicitante no Concello de Cortegada.

- Que o Concello de Cortegada sexa o primeiro empadramento.

- Que o nacemento fose inscrito no Rexistro Civil de Cortegada.

Cada neno/a nacido/a ou adoptado/a dará dereito a unha única subvención a favor dun dos solicitantes, proxenitores do menor.

Quinta. Obrigas dos beneficiarios

Será requisito para o pagamento efectivo da axuda que as persoas beneficiarias se comprometan, mediante documento asinado para o efecto a continuar empadroadas no municipio durante polo menos un ano posterior á presentación da solicitude de axuda

Os beneficiarios están obrigados a comunicarlle ao Concello calquera circunstancia que modifique as condicións para a obtención da subvención e a reintegrar a contía concedida cando se incumpra o compromiso adquirido pola súa obtención.

O réxime xurídico do reintegro de subvencións será o establecido no título II da Lei

38/2003, do 17 de novembro, xeral de subvencións, e na Lei 9/2007, do 13 de xuño, de subvencións de Galicia.

Sexta. Contía da subvención

A contía da axuda será de 300 euros por cada neno ou nena nacido nos anos 2020 ou 2021.

Sétima. Prazo para solicitar a axuda

O prazo de presentación de solicitudes será de tres meses, contado a partir do día seguinte ao da data de publicación destas bases no Boletín Oficial da Provincia.

Oitava. Documentación

A solicitude e a documentación presentarase nas oficinas municipais, sen prexuízo do disposto no artigo 16.4 da Lei 39/2015, do 1 de outubro, do procedemento administrativo común das administracións públicas. Tamén se poderá presentar a través da sede electrónica.

O impreso de solicitude (Anexo I) poderá obterse nas oficinas do Concello de Cortegada ou na páxina web municipal (www.cortegada.es).

A solicitude de subvención irá subscripta por ambos os dous proxenitores (ou por un no caso de familias monoparentais, ou no caso de separacións, divorcio debidamente acreditados), acompañada da seguinte documentación:

1. Fotocopia do DNI de todos os membros da unidade familiar maiores de idade.
Entenderase por unidade familiar, para os efectos destas bases, a formada pola/s persoa/s proxenitora/s, ou a persoa proxenitora e o/a cónxuxe ou persoa con análoga relación de afectividade, e máis as fillas e os fillos maiores de dezoito anos que convivan no mesmo domicilio.

2. Copia do libro ou libros de familia en que consten a/o filla/o da persoa solicitante nada/o nos anos 2020 ou 2021 ou, certificación de nacemento do rexistro civil

3. Nos supostos de adopción ou acollemento, ou titoría legal do menor, documentación acreditativa.

4. Certificado de empadramento no que consten, no mesmo domicilio, a primeira alta dos recién nados ou a alta dos adoptados e a acreditación de que un dos proxenitores ou adoptantes residían en Cortegada con anterioridade ao nacemento ou formalización da adopción.

5. Certificación de atoparse ao corrente coas obrigas tributarias (Estatais e autonómicas) e coa Seguridade Social.

6. Facturas xustificativas que cumpran os requisitos do Real Decreto Lexislativo 1619/2012, de 30 de novembro, polo que se aproba o regulamento que regula as obrigas de facturación. As facturas deberán cubrir como mínimo o importe da axuda (300,00 €) e nas mesmas deberá constar que se atopan pagadas ou ben acreditarse o pago mediante xustificante bancario ou certificación do proveedor. Considéranse gastos subvencionables: gastos en produtos alimentarios, hixiénicos, de saúde, textil ou puericultura que cumpran os seguintes requisitos:

-Que sexan realizados en data posterior á do nacemento ou adopción do neno/a que motiva a subvención e sempre dentro do prazo máximo de subvención.

Non serán subvencionables os gastos subvencionados ao abeiro das Bases Reguladoras da convocatoria de axudas por nacemento ou adopción de fillos no Concello de Cortegada, durante os exercicios 2019 e 2020.

- Que a factura conste a nome da persoa beneficiaria da subvención.

7. Certificado da conta bancaria na que se solicita o ingreso da axuda.

8. Copia da sentenza de nulidade, separación ou divorcio e do convenio regulador, de ser o caso.

9. Compromiso dos beneficiarios da axuda e do nado/a de permanecer empadroados no municipio durante polo menos un ano posterior á presentación da solicitude de axuda.
(Anexo I)

10. Declaración xurada de que o beneficiario reside no Concello de Cortegada
(Anexo I)

Novena. Exame das solicitudes

Unha vez revisadas as solicitudes, se non estivesen debidamente cubertas ou non se presentase a documentación solicitada polo Concello, requirirase ao interesado para que no prazo de 10 días emende a falta ou presente os documentos preceptivos, coa indicación de que, se así non o fixese, se entenderá que desiste da súa petición, logo da resolución que deberá ser ditada nos termos previstos no artigo 21 da Lei 39/2015, do 1 de outubro, do procedemento administrativo común das administracións públicas.

Décima. Resolución

Os expedientes serán resoltos pola Alcaldía no prazo máximo de tres meses, dende o día seguinte á data de presentación da solicitude.

Décimo primeira. Responsabilidades

Calquera falsidade que se detecte dará lugar ao non recoñecemento da axuda ou, no caso de tela percibido xa, á devolución desta cos xuros legais correspondentes,

independentemente das responsabilidades administrativas, civís ou penais que se puidesen esixir.

Décimo segunda. Tratamento de datos de carácter persoal.

Os datos de carácter persoal aportados polos aspirantes serán tratados polo Concello de Cortegada como responsable do tratamento, con a finalidade de xestión da solicitude, concesión e seguimento e control da subvención. Polo tanto, os seus datos serán tratados para poder tramitar a súa solicitude e resolvela convocatoria na que participa. A base de lexitimación para o tratamento é o exercicio das competencias conferidas ó Concello e no cumprimento de obrigacións legais polo Concello. Os datos de carácter persoal non serán comunicados a terceiros salvo no caso de organismos competentes no control e fiscalización da xestión económico-financeira e presupuestaria do Concello. Os datos serán conservados durante o tempo necesario para cumprir coa finalidade para a que foron recollidos e para determinar as posibles responsabilidades que se puideran derivar de dita finalidade e do tratamento dos datos, e como mínimo durante o prazo de prescrición do dereito da Administración para o reintegro das subvencións (catro anos), de conformidade coa Lei 9/2007, de 13 de xuño, de subvencións de Galicia e a Ley 38/2003, de 17 de novembro, General de Subvenciones. Será de aplicación o disposto na normativa de arquivos e patrimonio documental español. Pode exercitar os seus dereitos de acceso, rectificación, supresión e portabilidade dos seus datos, de limitación e oposición ó seu tratamento, así como a non ser obxecto de decisións baseadas unicamente no tratamento automatizado dos seus datos, cando procedan, ante o Concello de Cortegada, en Rúa Otero Novas, 2 - 32200 Cortegada (Ourense). Email: dpo@legalforma.com.

Así mesmo, o interesado ten dereito a presentar unha reclamación relativa o tratamento de datos ante o Delegado de Protección de Datos do Concello de Cortegada, no correo electrónico dpo@legalforma.com, ou, no seu caso, ante a Axencia Española de Protección de Datos, C/Jorge Juan, 6, 28001- Madrid o en la dirección de correo electrónico dpd@aepd.es.

Disposición final.

Para o non previsto nesta bases estarase ao disposto na Lei 9/2007, do 13 de xuño, de subvencións de Galicia, na Lei 38/2003, do 17 de novembro, xeral de subvencións, e no Real decreto 887/2006, do 21 de xullo, polo que se aproba o Regulamento da Lei xeral de subvencións.”